

續古文辭類纂

冊十三

續古文辭類纂卷二十四

下編之六

碑志類

施愚山神岡山廟碑

施閏章字尚白號愚山安徽宣城人順治己丑進士初任江西

參議裁缺歸康熙己未舉博學鴻辭官侍讀有學餘堂集

廬陵之南十里曰神岡山其廟曰惠祐祀太守彭城

劉公山故名翠峯以其廟神之孔赫也相與神之僉

謂之神岡云公諱竺任陳為廬陵太守政治於郡人

既卒其民悲思叫呼謂公嘉惠我邦吾儕小人弗敢

忘其擇地祠之作廟於山之岡雨暘之不若百穀之

不堅實疾病之不時去凡有冀而不獲它無可告則

惟神是歸先時邑人龍昌裔家積粟利在歲饑以涌

其糶會旱私丐神請更彌月勿雨是日輒大雨雷震

昌裔死廟下視其髮中得禱旱之詞于是民有懷慝

不仁者心掉魂奪亟走去不敢入廟其神大顯南唐

保大中贈工部尚書明惠侯宋宣和中賜惠佑廟額  
紹興三年封嘉應侯徐鉉胡銓先後紀其事其山拳  
曲而憑江水清林茂山川雲物之美具可登望余閒  
從賓僚往遊顧廟碑石壞闕文字謂廬陵縣令于君  
藻曰劉公澤在民廟食斯土禱之輒應又能奮餘怒  
擊頑貪震悚觀聽補吏職所不逮惠且能義今碑版  
缺剝卽事存傳記來觀之人猝無徵覽奚以顯神德  
而禁民非于君曰請具石公其撰詞于是大書其事  
系之歌以享神其詞曰

山之椒雲油油公駕遊兮赤虬鞭斥猛獸兮俾我以  
休山之阿楓冥冥公其降兮霓旌膏我黍苗兮甘雨  
以零擊鼉鼓兮薦江芷公弭節兮飲食燕喜山有岡  
兮水有涯公竭而去兮來何遲生我牧兮歿我師疇  
敢不率兮公知之

姜湛園安城楊君墓誌銘

姜宸英字西溟號湛園浙江慈谿人康熙丁丑進士

官編修有湛園未定稿

康熙二十八年己巳春車駕南巡至蘇州有紹興人  
士楊賓及其弟寶以父得罪徙寧古塔久泣血奔叩  
行在願身率妻子代父戍上駐輦問之以其罪名  
重非祖制不允又沿御舟行數百里呼號竄突騎  
從閒人馬蹂踐衛士執鞭箠雨下賓兄弟出彊辭與  
抗幾斃終不得達由是見者皆感泣稱爲孝子孝子  
旣而諗知其父得罪狀又有可憐者賓父以壬寅冬  
徙塞外其行述所謂安城府君者也君旣謫塞外是  
時賓年纔十三後二十八年賓始得往視之又二年  
辛未冬十一月某日君竟歿於戍所君所坐於國法  
不得還葬妻隨行者例留之賓聞赴衰服跪刑部兵  
部門凡四百五十有五日號泣陳訴垢形骨立酸動

行路當事者憐之爲求比例遂得請蓋上之曲成人孝如此今年九月某日寶扶柩抵潞河母范孺人亦隨到賓與余族弟寓節善數爲余述其賢旣聞余在都則泣請曰吾父以徇友譴死非子寵之銘不足以慰吾親于地下銘曰

君諱春華越其更名友聲其字居越安城晚遂自號不忘所生父蕃業儒旣而不就累官總兵副鎮京口君年十七補博士員適當明季厭經生言散金結客豪俠滿門卒以賈禍亦不言冤君之得禍以友滋蔓友亦被牽密書屬援爲邏者獲友固弗承君謂我出事始得明國有常憲棄友于市處君末減南冠而繫君初出塞雪花如掌朔風狂吹指墮馬上渡混同江那木色齊種種惡道及諸阿機萬木排比仰不見天老根亂石斷冰結連不受馬蹏起踣其閒異鳥怪獸

叢哭林。嗥同侶。失色百聲號。吽君獨凝睇。山川阨塞。詭形殊勢。筆之于冊。忽然長嘯。攬轡支策。掉頭吟詠。不爲戚戚。人傳君貌。有頤而黑。修髯大聲。雙眸電射。至則謾罵。其守土士。彼愕不知。或瞠而視。時法初立。漢人罕至。至輒爲傭。犬彘之飼。君教入山。斫木爲屋。蔽以木皮。炆銚具足。以我所攜布帛絲枲。易其魚皮。人稍知市。爲賈而豐。教以字書禮讓。蔚興藹藹。邨墟贖諸罪隸。生者養之。死給之。韡婚喪以時。不足爭助。後則爲恥。曰不可見。楊馬法矣。長老之稱。馬法是云。馬法旣死。哭聲田田。柩所過道。設祭魚飧。綿壽七十。子三賓寶。季名曰寵。女二孫。九女孫亦二。幼尚未字。初君之出。其色揚揚。視死與生如去來常。況死而歸。先壟是依。是惟有子。以釋君悲。子也。式穀守爾初服。

銘勒諸幽。允臧墨卜。

魏叔子云。以銘辭敘生平。不漏不支。委帖排冪。蓋上揜荆公下。

軼時賢  
者也

姚姬傳光祿大夫刑部尚書贈太傅錢文端公墓誌  
銘并序

刑部尚書嘉興錢公登朝爲名卿老而告歸上承  
聖人之殊眷下爲海內文學之士宗仰爲耆碩者又  
二十餘年乾隆二十九年正月辛酉薨於里疏聞  
上悼惜甚至製詩哀之命贈太傅祀於賢良祠諡之  
曰文端中賜祭葬如制特予銀千兩治喪其子汝誠  
以是年十二月葬公武原生坊南化城請予爲銘按  
狀公諱陳羣字主敬明給事中贈太常卿徽者公六  
世祖也曾祖諱陞祖諱瑞徵考諱綸光三世皆以公  
貴贈光祿大夫妣皆一品夫人公之少也讀書穎悟  
過人未二十遊京師則已與諸名士論文唱和相得  
時言才士卽曰錢君康熙四十年公成進士改庶吉

士授職編修。世宗時三進官至侍讀學士。充日講

起居注官。直南書房。今上登極擢通政使司右通

政。四進官至刑部侍郎。以疾歸里。公當事持大體。守

成法。爲編修時嘗爲陝西宣諭化導使。在事稱爲能

及久任刑部。讞獄剖晰得情。甚稱職然。上尤愛公

詩文之美。嘗樂與考論。今古稱爲故人。公之歸也。

上每思見之。公以所作詩奏進。上覽之。未嘗不稱

善也。公歸後五年。上南巡。賜在家食俸。後三年。

皇太后慈壽七十。公入都慶祝。命加尚書銜。與

九老之會。圖形禁中。後又兩值。南巡。加命以刑部

尚書致仕。晉太子太傅。至皇太后壽八十。公再入

都。年八十六矣。猶健步。上見公益喜。賜騎馬紫

禁城。再與九老之會。公子汝誠爲戶部侍郎。侍養於

家。及是隨公入朝。父子卿貳。持杖扶攜。出入宮苑。禁

闡之中。觀者以爲榮。其歸也。又賜詩以寵其行。公嘗一爲會試總裁。三典鄉試。再提督學政。及年益高。天下文士翕然趨之。公亦和易。與後進談說。往復論難。不厭吟誦詩章。音節抑揚。要眇說先朝故事。歷歷首尾。如披史傳。聽者每至中夜忘疲。是時長洲沈文愨。公在吳。公在嘉興。天下以爲齊名。雖上亦稱爲二老也。文愨旣歿。後四年。公亦亡。於是上自九重。下洎朝士。以及閭閻。識與不識。莫不歎息悲傷。謂東南耆舊盡矣。公年八十。又九。再娶皆俞氏。皆一品夫人。與公祔葬。子七。長侍郎汝誠。次汝恭。汝愨。汝隨。汝豐。汝弼。公以汝弼嗣。弟界。後幼子汝器。上南巡。爲公賜汝器爲舉人。女九。孫男十五。曾孫二。銘曰。多士雲興。蔚此昌時。孰爲魁英。備履福祺。秀水之郭。鴛湖之湄。公起登朝。作吏之儀。歸樂太平。爲羣士師。

上與天子賡和其辭。衆望哀然。既老不衰。我嘗識之。丹頰白髭。飲酒笑談。寡怒多怡。國有上瑞。匪鸞匪芝。進觀公貌。退讀公詩。詩則永留。貌不可追。刻示後來。吾言不欺。

姚姬傳袁隨園君墓誌銘

并序

君錢塘袁氏諱枚字子才。其仕在官有名績矣。解官後。作園江甯西城居之。曰隨園。世稱隨園先生。乃尤著云。祖諱錡。考諱濱。叔父鴻。皆以貧遊幕四方。君之少也。爲學自成年二十一。自錢塘至廣西省。叔父於巡撫幕中。巡撫金公鉞一見異之。試以銅鼓賦。立就甚瑰麗。會開博學鴻詞科。卽舉君。時舉二百餘人。惟君最少。及試報罷。中乾隆戊午科。順天鄉試。次年成進士。改庶吉士。散館。又改發江南爲知縣。最後調江甯知縣。江甯故巨邑。難治。時尹文端公爲總督。最知

君才君亦遇事盡其能無所迴避事無不舉矣既而  
去職家居再起發陝西甫及陝遭父喪歸終居江甯  
君本以文章入翰林有聲而忽擯外及為知縣著才  
矣而仕卒不進自陝歸年甫四十遂絕意仕宦盡其  
才以為文辭歌詩足迹造東南山水佳處皆徧其瑰  
奇幽邈一發於文章以自喜其意四方士至江南必  
造隨園投詩文幾無虛日君園館花竹水石幽深靜  
麗至櫺檻器具皆精好所以待賓客者甚盛與人留  
連不倦見人善稱之不容口後進少年詩文一言之  
美君必能舉其詞為人誦焉君古文四六體皆能自  
發其思通乎古法於為詩尤縱才力所至世人心所  
欲出不能達者悉為達之士多效其體故隨園詩文  
集上自朝廷公卿下至市井負販皆知貴重之海外  
琉球有來求其書者君仕雖不顯而世謂百餘年來

極山林之樂。獲文章之名。蓋未有及君也。君始出試。爲溧水令。其考自遠來縣治。疑子年少。無吏能試。匿名訪諸野。皆曰。吾邑有少年袁知縣。乃大好官也。考乃喜。入官舍。在江甯。嘗朝治事。夜召士飲酒賦詩。而尤多名蹟。江甯市中。以所判事作歌曲。刻行四方。君以爲不足道。後絕不欲人述其吏治云。君卒於嘉慶二年十一月十七日。年八十二。夫人王氏無子。撫從父弟樹子通爲子。旣而側室鍾氏又生子遲。孫二。曰初。曰禧。始君葬。父母於所居小倉山北。遺命以己祔。嘉慶三年十二月乙卯。祔葬小倉山墓左。桐城姚鼐。以君與先世有交。而鼐居江甯。從君遊最久。君歿。遂爲之銘曰。

粵有耆龐。才博以豐。出不可窮。匪雕而工。文士是宗。名越海邦。藹如其冲。其產越中。載官倚江。以老以終。

兩世阡同。銘是幽宮。

姚姬傳中憲大夫雲南臨安府知府丹徒王君墓誌

銘并序

君諱文治字禹卿丹徒人自少以文章書法稱於天下中乾隆三十五年一甲三名進士授編修爲壬午科順天鄉試同考官癸未科會試同考官其年御試翰林第一擢侍讀署日講官旋命爲雲南臨安府知府數年以屬吏事鐫級去任其後當復職矣而君厭吏事遂不復就官高宗南巡至錢塘僧寺見君書碑大賞愛之內廷臣有告君招君出者君亦不應君之歸也買僮教之度曲行無遠近必以歌伶一部自隨其辨論音樂窮極幽渺客至君家張樂共聽窮朝暮不倦海內求君書者歲有餽遺率費於聲伎人或諫之不聽其自喜顧彌甚也然至客去樂散默

然禪定夜坐脅未嘗至席持佛戒日食蔬果而已。如是數十年其用意不易測如此。君少嘗渡海至琉球。琉球人傳寶其翰墨爲文尚瑰麗。至老歸於平淡。其詩與書尤能盡古今之變。而自成體。君嘗自言吾詩字皆禪理也。余與君相知旣久。嘉慶三年秋過丹徒訪君。君邀之涉江風雨中登焦山東昇閣臨望滄海邈然言蟬蛻萬物無生之理自是不復見君。今君子來訃以嘉慶七年四月二十六日跌坐室中逝矣。妻女子孫來訣不爲動容問身後事不答。然則君殆莊生所謂遊方之外與造物爲人者耶。著作文藝雖工妙特君寄迹而已。況其於伎樂遊戲之事乎。君年七十二。夫人黃氏生子槐慶女四。壻曰溧陽狄某丹徒陳某商邱陳杲長洲宋懋祁孫男六。將葬君某所。鼎爲之銘以代送窆。鼎爲王氏秀山阡表具君世矣。故

不復述銘曰

茫乎其來何從乎。芬乎其往何終乎。嗟吾禹卿乎。生而燕樂與世同乎。名表於翰墨之叢乎。骨蛻於黃壤之宮乎。脩乎寥乎。憑日月之光而遊天地之鴻蒙乎。

銘辭高絕。邈然難攀。

姚姬傳四川川北道按察副使鹿公墓誌銘 并序

公諱邁祖字紹聞定興鹿氏始明監察御史久徵有直諫名久徵生正明熹宗時嘗營救左魏諸君子之難天下稱爲鹿太公者也太公生太常少卿繼善殉節死諡忠節忠節子曰化麟舉鄉試第一居父喪殁人謂之孝子孝子之子諱盡心公之曾祖也爲安邑令公祖諱賓仕本朝爲陝西道監察御史考諱聖權封奉政大夫公雍正八年庶吉士授編修以四川川北道按察副使罷官乾隆二十九年十二月十

四日卒於家。年六十。夫人王氏先卒。子二琪。廩膳生。次預。早卒。以乾隆三十二年某月日葬。公及夫人於江村祖塋之側。銘曰。

鹿氏在明。忠孝久稱。有肖無替。累以世嗣。魏副使公。彪文。績質。始作詞臣。究通經術。匪曰能言。而允行之。以學事君。在心不欺。命作御史。有辭蹇蹇。君子所予。小人所憚。巡察帝城。周閱殷廣。閉杜謁言。搜邪伐黨。給事於中。掌禮吏科。審較牘奏。詳而不苛。轉運奉使。湘湖之南。羣吏放手。民則弗堪。覈正斗甬。公以躬監。正稅罔贏。誅責貪慝。有盜殺人。吏論如法。撫軍卻之。謂不當執。罷按察使。而令公攝將。馭律令。意授威懼。或旁諷公。公曰。不可。佑賊詭正。甯禍及我。言忤上官。解其柄。持改任川北。畀以疲羸。親入山林。掘盜根株。哀問民生。慰恤瘠枯。直時軍興。征金川。醜以馬濟軍。

百城交走。或應於前而乏於後。歸罪邑令。大吏藉口。公曰。憊矣。非令之咎。予以身任。遂遭彈奏。吏籍其家。敝几故書。怨嫉之徒。媿感嗟吁。詔荷公校。以重軍。罰大吏。憐公。勸使私脫。公曰。詔乎。脫余則爲苟。非君命。敢奸以欺。卒朝夕。荷西師。隨罷。既有定功。公亦蒙赦。公之在官。疑疑剛毅。公之在家。愉愉孝弟。歸遭父喪。以毀受病。秉道終身。卒斃於正。有懿夫人。飭身約己。佐公清節。誼不爲侈。同穴江村。高墳磊砢。我銘直諒。以厲媿媿。

姚姬傳汪玉飛墓誌銘

并序

汪生行忠信而立志甚高。不與今世士同流。謂士舍宋儒程朱之所道。以爲學。舉不足云學也。晝動而暮休。必考一日所爲得失。離合。悉書於一冊。以自爲戒。勸事其父兄。撫其妻子。交其師友。循今世之禮。通以